

顾华阳集

一函
二册

欽定四庫全書提要

華陽集三卷附顧非熊詩一卷

唐顧況撰況字逋翁海鹽人至德二年進士德宗時官祕書郎遷著作郎貶饒州司戶參軍晚年退居茅山自號華陽真逸集有皇甫湜序稱為三十卷讀書志作二十卷書錄解題惟載其詩集云本十五卷今止五卷其本今皆不傳此本乃明萬厯中況裔孫名端裒其詩文成三卷

未附況子非熊詩十餘首文苑英華唐文粹中
所載尚未全收未為賅備也皇甫湜稱自為況
作集序未嘗許人則況在中唐名甚重非熊詩
有父風長慶中登第大中間為盱眙簿亦棄官
隱茅山酉陽雜俎記況作殤子詩旦夕悲吟其
子之魂聞之因再生為況子即非熊也其事怪
誕不足信本事詩又載況紅葉題詩事尤屬不
經其所題詩亦猥鄙不足傳皆好事者為之也

舊本所有姑存之以為談助云爾

文淵閣直閣事兵部侍郎

臣紀昀

文淵閣直閣事大理寺卿

臣陸錫熊

太常寺少卿

臣孫士毅恭校

重刻顧華陽集序

桂自學為古文獲

顧亭林先生集讀之其文磊落

光明心事皎如日月空所倚傍有浩然之氣溢於行間在

國朝諸名公之上而未得其家系所自乙卯歲桂卸

潮州通判篆居郡城適鑑堂先生權運同篆治聲

卓然授其三十五世祖逋翁公華陽集讀之其文

體與亭林先生有間而骨力之蒼雄志氣之豪邁踔

厲峻發不可一世與亭林先生文相似今觀亭林先生撰書臺記乃知亭林先生為逋翁公二十三世族孫而後知其文章之淵源有自也鑑堂先生恐板久殘廢欲謀重梓囑桂為之序桂湘南一淺學鯁生耳何能闡揚萬一且其耿介之操高世之節載於史乘其唱和見於白香山韋蘇州諸人其事業見於輔成韓晉國公滉之治績其往來見於李泌柳渾之方外友其學術見於韓昌黎高弟子皇甫湜持正之序尚

何須千餘年後之管測蠡窺惟是四明山人為桂居
舊籍浙紹之始祖其風韻時想見於李太白之詩語
而不得窺其全集今讀逋翁公和四明山人詩與附
集內四明山人答朝士之詩而知與逋翁公為密契
也惟桂家居鑑湖者竟無人紹修前業而逋翁公華
陽集纂輯於五十九世之正卿公其遺集續刻於六
十六世之旦華公今又重梓於鑑堂先生表揚手澤
後先輝映何羨如之又聞鑑堂先生云其家風素樸

鄉間有坊榜耕讀人家四字又有讀書臺係逋翁公
故蹟後之人俯仰於其間莫不為之興起行見繩繩
綿綿傳之不替於以振箕裘而垂世澤將又有亭林
先生其人焉出而張大之其貽美曷有既極哉鑑堂
先生治民誠待友信慷慨重氣節與桂交一見如舊
相識而兩家契誼已結於始祖公千載之前今之獲
叙是編不可謂非重結之緣也昔咸豐乙卯歲菊月
星沙後學賀桂齡謹序

書臺記

古里雙峯書臺勝迹景仰仙蹤高懷自適著作淵鴻

學窮典籍文采風流千秋共格

橫山讀書臺與秀水亭林湖讀書亭百世

流芳讀書亭乃陳黃門侍郎希馮公課子處逋翁公爲希馮公八世孫

崇禎辛巳仲春五十七世族孫炎武薰沐謹題

謹按三十五世祖

逋翁公華陽遺集乾隆癸巳年

本生曾祖旦華公纂刻咸豐乙卯年予重梓因板片

寄回家鄉辛酉疊遭寇患板片失存今再補刊同治

元年歲次壬戌閏八月朔日六十九世孫炳章薰沐

謹記於潮州旅舍

重刻唐著作郎顧華陽先生集序

海鹽顧賓角潁泉兩君者昆弟也與余同舉於鄉為
余言海鹽故多隱君子也南境多山有山孑然絕衆
山逆秦溪而上者角里山也秦角里先生故居也北
境多水又山孑然絕衆流而與角里相望者橫山也
唐著作華陽先生故居也今兩君者居則角里之秦
溪也裔則華陽之一脈也四十年來余嘗謂兩君落
魄一官不減華陽先生之逸又未舉子豈山川孤絕

信足致然乃賓角君實既有子名端矣弱冠游太學
有聲矣將復梓先生集而以其序請矣余與賓角合
志同鄉共聽鹿鳴比肩而事明主曾未知其有子且
久何足以與知先生而能言先生雖然誦詩讀書以
論世也不知其人容視其友況先生言具在皇甫君
之言先生者具在耶古之君子懷瑾握瑜曷嘗不欲
遭時遇主論議深謀以澤潤生民而廓清夷夏唯是
薰蕕不能同器俛仰不能異容則林壑疑寬而廊廟

偏為枳棘此先生所以才抱不羈志堅獨往黃衫白
鞵而卒老青山有以自樂也故對揚受命則過秦典
引遜其華抽思上古則芮伯屈平多其怨吟咏性術
停雲止酒不加於適寄言方外珠宮海藏未罄其珍
以彼筆端造物字挾風霜及今以之猶將密勿絲綸
履星辰而依日月安在不知其人而月脅天心唯皇
甫之言是襲也邑史載非熊再世為先生子特著才
名而好辯沉淪未究先生膏澤則今之舞夏成均而

追尋先業思以光大其傳者洵賓角君之有子而先生之澤於是靈長也士有放言自廢耳商山羽翼白首見奇何必非隱君子山川孤絕安知其不後先生者之以奇勝也余於兩君乎有感并以為序云餘姚

孫鑛譔

顧逋翁集叙

傳曰君子之澤五世而斬人皆謂然余唯唯否否莊
生之言曰天與地無窮人盡者有時操有時之具而
託於無窮之間忽然無異騏驥之馳過隙也是五世
一瞬也風雨晦明其間不能以刻也所流者風所餘
者韻而委蝕剥落也乎哉以余觀顧逋翁有唐逸人
也而逸史稱況常求知新亭監監在鹽官海瀕復家
於縣南五十里之橫山有禪寂寺迄今百世後可得

而言則逋翁之遺跡宛然在金粟紫雲秦谿溟渤間
獨怪其人與澤在千載以上落落穆穆曠濬敞罔之
謂何也無何而顧氏名霑者以世廟乙未釋褐為令
有聲尋至粵大參未竟其用而卒家在橫山遂以為
號因憶逋翁有家在雙峯蘭若邊之句豈其識與迨
穆廟庚午賓角穎泉兄弟雙蜚國華大振厥響功名
猶若少遜於大雋而遙憶逋翁當日政不以此見奇
也而睢睢盱盱而誰與居大白若辱盛德若不足逋

翁有焉兩君豈其少此而賓角有子正卿者翩翩都
雅不屑裘馬少年日拾遺文而總託之曰是吾家傳
龜襲紱也吾父若叔人號雙珠出老蚌而茲集懸之
國門將無一字似南金乎遂悉索原稿以傳大都嘉
禾湖郡華亭蘇州皆有著述詩則諸體咸備以稱著
作佐郎無忝矣因念逋翁以知新亭監圖貌海中山
而遂盤薄於此雖其登歌眺詠滿目淋漓而麋鹿白
雲會心豪宕此身還似籠中鳥東向滄溟叫數聲繫